

弘

簡

錄

弘簡錄卷三十六

明刑部員外郎仁和邵經邦弘齋學

皇清翰林院侍講學士四世孫遠平校閱

臺諫 唐五之一

孫伏伽

李素立

李綱

孫安仁  
安靜

魏徵

子叔瑜  
華

王珪

孫  
素

張玄素

高季輔

馬周

子載

戴胄

子至  
德

孫伏伽貝州武城人大業末由大理寺史累勞補萬年縣法曹  
武德初帝初受禪欲盡下情最先上言三事其一臣聞天子有  
爭臣雖無道不失其天下隋正坐此遂失天下當時非無直言  
之臣自謂功德超邁窮侈極欲不顧肝腦塗地戶口殫耗盜賊  
日滋君不受諫臣何敢言向使開不諱之路官賢授能賞時罰  
當人人樂業誰能搖亂者乎陛下一舉晉陽天下響應計不旋

踵大業以成勿以得之之易而忘失之不難也。天子動則左史書之言則右史記之。凡蒐狩當順四時不可妄動。近有獻鷄者不却而受。此前世弊事。奈何效之。相國參軍盧牟子獻琵琶。長安丞張安道獻弓矢並被賞賚。以率土之富豈少此物哉。其二言百戲散樂非韶非夏大戾正音。隋末始見崇川。近太常假民裙襦五百稱以衣妓工。擬五月五日侍玄武門遊戲。臣謂此非貽厥之謀。請一切廢之。以復雅正。其三臣聞性相近習相遠。方今急務在擇太子。諸王左右執事其或不義無賴馳騁射獵歌舞聲色漫遊之人止可悅耳娛目。次不敢望其拾遺補闕。汎觀前世子孫不克孝兄弟不克友莫不由左右亂之。願選賢才澄僚友之選。帝大悅。卽下詔云。周隋季世忠臣結舌朕惟寡德不能性合天道。方冀弼諧以輔不逮。而羣公卿士罕進直言。伏伽

至誠慷慨。據義懇切。指朕過失。無所隱諱。其以願示羣臣。擢爲  
治書侍御史。又數請釐損軍興賦斂。煩重帝並從之。二年帝語  
裴寂。隋爲無道。主驕於上。臣諂於下。上蔽蒙。一旦身死。匹夫  
之手。寧不痛哉。朕今不然。平亂責武臣。守成責文臣。程能付事。  
以佐不逮。虛已盡下。冀聞嘉言。若李綱孫伏伽。可謂諍臣矣。俛  
首。縈默。豈朕所望哉。東都平。大赦天下。又欲責世充。建德支黨。  
悉流惡地。伏伽諫曰。臣聞王者無戲言。書稱爾無不信。朕不食  
言。言之不可不慎也。頃詔下。常赦不免。皆原之。此非直赦有罪。  
是與天下更新也。且獐狗吠堯。吠非其主。渠魁尙免。脅從何辜。  
自古以來。何代無君。而獨稱堯舜者。由善名難得也。昔天下未  
平。尙容應機制變。今四方已定。設法須與人共。旣陛下自作。亦  
須自守。使百姓人人信從。若自爲無信。何以責人之信哉。未幾

上表請廣置諫官帝皆欽納太宗卽付賜爵樂安縣男遷大理少卿見帝馳馬數出諫曰臣聞天子之居禁衛九重出警入蹕非直尊其居處爲社稷生人計也比聞走馬射帖娛悅羣臣殆非所以導養聖躬垂憲後代此直少年諸王務耳安得爲聖天子所行竊爲陛下不取帝悅曰朕能改之尋坐失奏罪囚免官起爲刑部郎中至大理卿時司農市木植倍直與民左丞韋棕劾吏隱沒下大理訊伏伽奏駁曰緣官市貴故民直賤臣見司農識大體不見其罪帝悟顧棕曰卿不逮伏伽遠矣久之出爲陝州刺史致仕顯慶三年卒生平度量寬重始被內旨拜御史制尙未出歸臥於家頃之使者造門子弟驚白徐起見之初無色喜當時以比顧雍云

李素立趙州高邑人曾祖義深北齊梁州刺史祖駘散騎常侍

父政藻隋水部郎中使淮南死於盜素立武德初擢監察御史  
民犯法不及死高祖欲殺之諫曰三尺法與天下公共設一動  
搖則人無所措手足方大業經始奈何輒殺之下先棄刑書乎  
帝嘉納由是恩顧特異以親喪解官起帝令授七品清要有司  
擬雍州司戶參軍帝曰要而不清復擬秘書郎曰清而不要乃  
授侍御史貞觀中轉揚州大都督府司馬久之拜爲瀚海都護  
以領突厥鐵勒部會闐泥熟別部數梗邊朝廷議欲用兵素立  
以爲不足勤王師遣使諭降間屯田立廨舍募人感其惠率牛  
馬以獻止受酒一杯餘悉歸之久之歷太僕鴻臚二卿封高邑  
縣侯出爲綿州刺史未徵初徙蒲州將之任所餘糧儲什物皆  
令州司收之惟資已書籍而去無何道病卒廢朝一日諡曰平

子休烈好學有文終鄆縣令

李綱字文紀。觀州舊縣人。祖元則。後魏清河太守。父制。周車騎大將軍。綱少慷慨。尚風節。每以忠義自許。本名瑗。慕張綱爲人。改今名。仕周。參齊王憲軍事。宣帝將殺憲。名僚屬證成其罪。矢死無撓。誅後。故吏韓匿獨斂棺號慟。終乃去。後撫其孀女。并子立。贖恤之。事隋爲太子洗馬。數諫。勇進倡優。惑視聽。設上問之。爲殿下。累勇不聽。及廢綱。對上言。此不素教所致。非獨太子之罪。帝因自引咎。不之罪。擢尚書右丞。立朝恒據正道。不爲詭隨。迎合楊素。蘇威等威憾之。出爲將軍劉方行軍司馬。往討林邑。方揣素意。數因辱之。軍還。不得調。屏居鄆縣。賊帥何潘仁劫爲長史。會唐王入京。上謁授丞相府司錄參軍。封新昌縣公。領選舉。受禪。拜禮部尚書。兼太子詹事。以隋世舊臣。手勅未嘗名。帝怒。齊王元吉棄太原。致并州陷。謂王年少。不習事。欲斬輔佐。

宇文歆綱諫王過惡乃竇誕養成之歆事王淺尙賴有闕必諍使陛下不失愛子又可加罪乎帝悟引升御榻勞之又以舞部安叱奴爲散騎常侍綱諫天下新造陛下開太平之基功臣賞未及徧高才猶伏草茅而先令此輩鳴玉曳組位五品趨丹地殆非創業垂統之道帝不納太子嘗遊溫湯有疾不從會有獻魚者唐儉趙元楷諍能爲膾太子笑曰操刀膾鯁公等善之若審諭弼諧固屬綱矣遣使貽之絹綵其爲禮重如此後寢狎亡賴猜間朝廷綱頗諫不從固請乞骸高祖罵曰曩爲潘仁長史今乃羞朕尙書耶綱頓首曰潘仁雖賊志在殘殺然每諫輒止陛下功成自伐臣言如水投石敢久戀耶且東宮又與臣忤帝謝曰知公直士卒輔吾兒進拜太子少保上疏以今備位保傅幸未就木冀得効愚凡爲人子務孝謹以慰上心不宜聽受



邪說與朝廷生惑間太子覽書不懌所爲益縱綱悒悒不自賴  
懇許解官貞觀四年太子承乾立復拜少師以足疾聽乘步輿  
至閣及東宮命太子親拜之每聽政令與立齡王珪侍坐王有  
召問發言陳事毅然不可奪嘗與太子商畧古來君臣名教父  
子孝理并竭忠盡節之事辭順理直聽者忘倦自負託孤寄命  
非已所難後寢疾帝遣房立齡至家存問賜以縑帛卒年八十  
五贈開府儀同三司諡曰貞太子復爲立碑齊王憲女被髮號  
泣如喪所親于少植隋武陽郡司功書佐先卒孫安仁未徵中  
爲太子左庶子陳王廢亦涕泣拜辭朝野義之後終恒州刺史  
安靜天授中爲右衛將軍武后革命誣收繫獄殺之會昌中訪  
忠臣後子孫已絕乃贈安靜太子少師自綱五世同居二孫復  
以義烈聞世稱李氏不衰

魏徵字玄成魏州曲城人父長賢北齊也留令徵少孤貧落拓  
有大志不營貲產通其書術見隋末漸亂詭爲道士尤勵意縱  
橫之說會武陽郡丞元寶藏舉兵應李密以徵典書記密聞其  
名促召見首進十策以干密雖奇之而不能用後隨密來降無  
所知名久乃自請安輯山東擢秘書丞馳赴黎陽遣徐世勣書  
反覆千言歸於天命不早自圖大事將去勸得書歸計遂決始  
大發粟饋淮安王軍無何寶建德陷黎陽復爲所獲僞署起居  
舍人敗後仍入關隱太子招爲洗馬甚禮重之陰勸以秦王功  
高幸早爲計內變已定王切責徵離間骨肉答曰向若使蚤從  
徵言不死今日之禍王見其詞直且素器之引爲詹事主簿卽  
位拜諫議大夫封鉅鹿縣男白帝以隱刺餘黨多不自安往往  
潛伏思亂不示至公禍不可解帝命與李桐客往河北安慰得

便宜從事道遇械送太子千牛李志安齊王護軍李恩行願謂  
刺客曰頃者受命本爲官府舊人欲悉原之今復執送誰不自  
疑吾輩雖往人將不信卽貸而後聞還奏帝悅時帝勵精政道  
日益親暱輒引至臥內訪以天下事徵雅有經國才如無不言  
性復抗直無所回屈上欣然聽納自慶所遇不世出之主不能  
不展盡底蘊凡二百餘奏悉剴切當於帝意勞曰非卿至誠奉  
國何能若是遷尙書右丞仍兼諫議或有毀其阿黨親戚者帝  
使溫彥博按之無驗猶責以不存形迹遠避嫌疑致有此謗徵  
謝曰臣聞君臣同心是謂一體豈有不存至公反事形迹若上  
下由之邦之興喪未可知也帝震然悟徵因頓首曰願俾臣爲  
良臣母爲忠臣帝問忠良異乎對曰稷契咎陶身荷美名君受  
顯號子孫傳世流祚無疆龍逢比干已嬰禍誅君陷昏惡喪國

敗家祗取空名此其異也帝曰善賜以綰緡又問爲君者何得而明何失而暗對曰兼聽則明偏信則暗堯舜闢四門明四目達四聰雖有共鯀不能塞也靜言庸違不能惑也秦二世獨信趙高梁武帝獨信朱异侯景隋煬帝獨信虞世基天下土崩瓦解而不得知盜賊徧海內而不得聞此其驗也皇后以鄭仁基女美而才請爲充華典冊已具徵聞其已許聘士人陸爽乃諫曰陛下處臺榭則欲民有棟宇食膏粱則欲民有飽適顧嬪御則欲民有室家今鄭已約昏而娶之豈爲人父母意哉帝痛自咎卽詔停冊貞觀三年遷秘書監參預朝政西域諸國聞高昌王麴文泰朝悉遣使入獻詔使人迎之徵奏文泰所過一人尙不能供若加以諸國瀕塞州縣又何以堪且彼自爲商賈邊人利之而令中國受弊帝曰善追止其詔先是帝常歎大亂之後

疑其難治。徵曰：亂後易治。譬飢人易食，渴人易飲。其應如響。封  
德彝曰：不然。三代之後，日漸澆漓，故秦任法律，漢雜霸道，皆欲  
治，不能。非能治不欲，徵書生好虛論，徒亂國家，不可聽。徵曰：五  
帝三王，不易民以教。行帝道而帝，行王道而王。顧所行何如爾。  
黃帝逐蚩尤七十戰而勝，其亂因致無爲。九黎害德，顓頊征之，  
已克而治，桀紂無道，湯武征之，皆身及太平。若人漸澆漓，不復  
返朴，今當爲鬼爲魅，尙安得而化哉？倫不能對。及數年後，米斗  
三錢，幾至刑措。蠻貊君長，襲衣冠，帶刀宿衛。帝語羣臣：此魏徵  
勸我行仁義之効，惜不令封德彝見之。俄檢校侍中、進爵郡公。  
帝幸九成宮，宮御憇。漳川官舍李靖王珪繼至，吏改館。宮御以  
舍靖珪，帝聞怒，詔并按之。徵諫曰：靖等陛下心膂大臣，官人皇  
后隸役，若以此罪責，恐天下驚駭耳。臣無益德音，得釋不問。珪

又奏三品以上遇親王於途皆降乘以爲違法申敬有乖僉準  
帝疑云若此則臣下皆自崇貴界我兒子徵舉本朝舊例親王  
班三公之下卽今三品列卿乃八座之長爲王降乘非所宜然  
帝曰國家設無太子則毋弟次立今之親王豈得輕之徵謂殷  
人尙質有兄終弟及之義自周以降立嫡必長所以絕庶孽之  
窺塞禍亂之本有國者之所深慎遂可其奏尋宴丹霄樓酒酣  
帝頽長孫無忌曰魏徵昔與朕讐朕能棄怨用才無羞古人然  
或諫不從言輒不應何也徵曰臣以事有不可故諫若不從輒  
應恐遂行之帝曰第應之須別陳論有何不可徵曰昔堯戒羣  
臣爾無面從退有後言若面已許可又陳別論此乃後言非稷  
卨所以事君也帝大笑曰人言徵舉動踈慢我但見其嫵媚耳  
徵再拜曰陛下導臣使言所以輒敢若拒而不受鱗可逆批乎

七年代王珪爲侍中仍詔平治尚書滯訟素不習法但存大體處事以情人咸悅服又總撰定齊梁陳周隋五史多所損益務存簡正自作隋史序論梁陳齊總論成加左光祿大夫進封鄭國公加賜綵繒深懼滿盈辭有目疾遜位帝諭以金方在鑠未見可貴必冶煨爲器人方寶之朕自比於金藉卿良匠加礪目微有疾庸得便辭懇請乃拜特進知門下省事文德皇后葬昭陵帝卽苑中作層觀望之引微同升微熟視曰臣目眊不能見帝指示之微曰此昭陵也臣以爲陛下望獻陵若昭陵臣固見之帝泣爲之毀觀尋以定五禮當封一子縣男請移兄孤子叔慈帝憺然曰此可以屬俗卽許之隨幸洛陽次昭仁宮帝多譴責諫曰隋惟責人不獻食或供奉不精因此浪費以至於亡故天命陛下代之正當兢懼戒約奈何誨人爲奢帝曰非公不聞

此言退又上四疏

語多不錄

又因宴積翠池君臣酣樂賦詩徵末句

云終藉叔孫禮方知皇帝尊帝謂未嘗不約我以禮他日又從

容問比來政治若何對曰陛下貞觀之初得人使諫諫者悅而

從之比一二年勉強受諫終不能平帝驚問何以驗之對曰昔

者孫伏伽以元律師論死爲法不當陛下賜以蘭陵公主園或

言太厚答曰朕卽位未有諫者所以賞之厚此導人使諫也柳

雄妄訴隋資亦將論死戴胄奏當徙陛下謂曰第守法如此此

悅而從諫也近皇甫德參諫修洛陽宮收地租以爲勞人厚斂

俗尙高髻以爲宮中所化陛下恚曰是使國家不役一人不收

斗租宮人無髮乃稱其意雖以臣奏從之意終不平此強於受

諫也帝曰人苦不自覺非公無能道此先是諫作飛山宮畧曰

今之宮觀臺榭奇珍異寶姬姜淑媛不減於昔若能昭鑒興亡



焚寶衣毀廣殿安處界宮德之上也卽成功不廢因仍舊貫除其不急德之次也其或不思王業艱難祇言天命可恃甘心侈靡使人勞役斯爲下矣後遇大雨穀洛溢毀宮寺漂居人徵陳事尤爲切要其畧曰臣聞國保於誠誠基於信二者立則下無貳情故同言而信信在言前同令而行誠在令外若言而不行以其無信令而不從正坐不誠不信之言不誠之令君子弗爲自王道休明縣十餘載倉廩愈積土地益廣然而道德不日博仁義不日厚由待下之情未盡誠信雖有善始之勤而無克終之美立政則委之君子得失或訪諸小人故譽毀常在小人而督責常加君子夫名雖小人豈盡無智慧然不謂之忠名雖君子不能無小惡然無害於正若令君子小人是非不雜必存之以誠待之以信然後善善而惡惡審罰而明賞無爲之化何遠

之有。帝手詔嘉答。是歲廢明德宮。立國院。賜遺水者他日宴。召臣帝曰。貞觀以前。從我定社稷。開闢草昧。立齡功也。貞觀之後。納忠諫。正爲國家長利。微而已矣。雖古名臣。亦何以加。親解佩刀。賜之。又問微與諸葛亮孰賢。岑文本曰。亮才兼將相。似非可比。帝曰。微蹈履仁義。欲致君堯舜。雖亮無以抗。帝厭上封者衆。或不切事。欲加譴責。微諫曰。古來立謗木。欲聞已過。今之封事。乃其遺也。陛下思聞得失。當恣其所陳言而足。爲朝廷之益。假令或非。無損於政。由是皆勞遣之。十三年。阿史那結社率作亂。雲陽石然自冬至五月不雨。微上疏極言。臣奉侍帷幄十餘年。陛下許臣以仁義之道。守而不失。儉約朴素。終始弗渝。德音在耳。不敢忘也。頃年以來。漸不克終。謹用條陳。裨萬分之一。十漸見弘道錄夫禍福無門。惟人之召。人無毀言。妖不妄作。今旱暵之災。遽被

郡國凶醜之孽起於殺下此上天示戒陛下恐懼憂勤之日千載休期時難再得明主可爲而不爲臣所以鬱結長歎者也疏奏帝曰朕聞過矣願改之以終善道有違此言當何顏面與公相見以所上疏列爲屏障庶朝夕見之兼錄付史官使萬世知君臣之義因賜黃金十斤馬二匹高昌平侍宴兩儀殿舉齊桓公無忘在莒時管仲無忘束縛於魯時甯戚無忘飯牛車下時則社稷不危矣帝曰朕安敢忘時遣使立西城葉護可汗未還又遣市駿馬徵言如此彼必以爲意在馬不在立雖加封冊未見懷恩且諸蕃聞之以中國薄義重利也帝遂止帝以公卿大臣並請封禪惟徵執論不可諭曰豈功不高耶德未厚耶諸夏未治遠方不服耶嘉瑞不至年穀不登耶何爲而不可對曰陛下功則高而民未懷惠德雖厚而澤未旁流諸夏雖安未可驅

之役。遠方慕義。無以供其求。符瑞雖臻。爵羅猶密。積歲豐稔。倉廩尙虛。譬如人有十年長患。療治纔愈。便欲負重日行百里。必不可得。告成天地。臣竊有疑。兼以大事舉行。萬國咸萃。嬰荒之外。奔走來庭。今日伊洛以東。暨於海岱。人烟斷絕。道路蕭條。徒令窺見。示以虛弱。又賞賜未厭。衆望給復不償。民勞遇有災眚。難以追悔。帝不能奪。右僕射缺欲用徵讓。不拜。適太子與魏王交惡。帝曰。當今忠蹇貴重。無踰於徵。朕遣傅皇太子羽翼固矣。卽拜太子太師。復以疾辭。十七年疾甚。其家尙無正寢。命輟小殿材爲營。搆五日而畢。賜以素褥布被。從其所尙。中郎直宿。勅前輒聞。樂膳賜遺。使者綴道。帝與太子數臨問屏左右語。拊之流涕。許以衡山公主降其長子叔玉。是日亦從令。盟視新婦。領而不謝。遂薨。年六十四。帝哭再三。慟罷。朔五日太子舉哀。西華

堂百官咸赴贈司空相州都督諡曰文貞給以羽葆鼓吹班劍  
賻贈夫人裴氏辭以素尚儉約恐非其志乃更用素車白布幘  
帷陪葬昭陵其日帝登苑西樓望哭盡哀晉王致祭碑文御撰  
并書復思念不已時登凌烟閣觀像賦詩益封戶九百臨朝輒  
歎曰以銅爲鑑可正衣冠以古爲鑑可知興替以人爲鑒可明  
得失朕常寶此三鑑今微逝一鑑亡矣遺表惟半可識大抵以  
善惡愛憎爲戒務在愛而知其惡憎而知其善不患不安且治  
帝以爲恐不免斯過公卿侍臣可書之於笏微狀貌不逾中人  
而膽畧實大每逢盛怒神色不攝帝徐爲霽威稱者比之三代  
道立帝嘗上冢還欲有關南之行旣辦畏微而止喪亂以後典  
章湮散多引諸儒校集秘書後復粲然完整又以小戴禮綜彙  
不倫更作類禮二十篇數年而成帝美其書錄寘內府又因侍

宴以帝不忘武事天下雖治好威四裔每見舞破陣樂則俛首  
不顧至慶善樂則諦玩無斂舉有所諷切如此徵薨後媚者毀  
短百出以嘗薦杜正倫侯君集誣爲阿黨又言徵常錄前後諫  
章示史官指爲賣直帝滋不悅乃停叔玉婚什所爲碑顧其家  
亦衰矣後征遼東高麗靺鞨犯陣頻致危殆軍還悵然曰使徵  
若在吾無此行仍名其妻子至行在慰勞以少牢祠其墓復立  
碑加禮叔玉襲爵擢爲光祿少卿神龍初孫膺嗣次叔璘禮部  
侍郎叔瑜豫州刺史華草隸于華爲太子左庶子武陽縣男以  
筆意傳之及甥薛稷世以比之虞褚

王珪字叔玠太原祁人魏時爲烏丸氏曾祖神念奔梁復姓王  
氏祖僧辨梁太尉尙書令父顓北齊樂陵太守珪少孤性雅淡  
少嗜欲志量汲沉能安貧賤體道履正恬於所遇交不苟合開

皇末爲治禮郎季父頗通儒有鑒裁尤器許之頗坐漢王諒誅  
珪亡命十餘年母李氏賢明嘗謂吾信爾他日必貴然未知所  
與游者何如人試與偕來乃期房杜等素交善者悉過其家李  
窺見大喜亟具酒食情款盡日稱以皆公輔才汝貴不疑義師  
入關李綱薦署世子府諮議參軍東宮建授太子中舍人遷中  
允建成禮遇良厚太宗素知其才卽位名爲諫議大夫語曰正  
主御邪臣不可以致理亦猶正臣事邪主獨可以善治乎朕雖  
不明幸諸公數相諫正尙冀功效期於太平也珪奏主聖臣直  
千載一時今陛下開廣聖德收采芻蕘臣願竭狂瞽佐萬分一  
帝可之詔自中書門下及三品入閣必造諫官隨侍珪每推  
誠納善多所獻替帝頗待彌厚賜爵永寧縣男遷黃門侍郎兼  
太子右庶子貞觀二年拜侍中一日進見有美人侍側帝指以

示珪此廬江王瑗姬其夫爲瑗所殺而娶其妻珪起避席曰陛下以廬江所爲善耶惡耶帝曰殺人而取妻尙可謂善乎珪曰姬今在帝側竊謂陛下善之審知其惡何不進去若更納用此與郭公善善不能用惡惡不能去相幾何哉帝歎美其言又與溫彥博論太常祖孝孫其人修謹陛下使教宮人音樂不稱旨數責讓之天下共以士爲輕乎帝怒曰卿皆朕腹心當進忠獻直何乃罔上爲人游說耶彥博懼謝罪珪不謝曰臣本事前宮罪當死陛下矜其性命引至樞近責以忠効今臣所言豈得爲私不意陛下忽疑謂臣反思陛下負臣臣不負陛下帝默然而罷明日帝痛悔語房玄齡曰昔武王不用夷齊宣王殺杜伯自古帝王納諫固難朕夙夜兢兢恨不能仰及古人卿等勿因昨責珪等不進諫也時珪與玄齡彥博李靖戴胄魏徵同輔政帝



以珪善人物且知言因謂曰卿標鑒通悟爲朕言玄齡等確論見弘  
道後進爵爲郡公坐漏禁中語左遷同州刺史明年帝復思念  
召拜禮部尙書與諸儒正定五禮書成封一子爲縣男是歲兼  
魏王太師詔侍郎韋挺定制王見之先拜珪答拜珪亦師道自  
居王嘗問何爲忠孝珪曰至尊王之君事思盡忠亦王之父事  
思盡孝惟忠孝可以立身成名當年必享天佑餘芳尙垂後裔  
王敬聞命敢問所習答曰漢東平王蒼稱爲善最樂願王志之  
帝聞喜曰王子於宮闈少習寵驕鮮能知道我今選任師傅禮  
尊則教行益命王事珪當如事我則可以無過矣子敬直尙南  
平公主時諸主以帝女貴下嫁之日未嘗行見舅姑之禮珪曰  
今主上欽明動循禮度吾當受公主謁見匪爲身榮將以成國  
家之美是日與夫人坐堂上主親執笄行盥饋之禮乃退其後

公主下降咸備婦禮自此始也十三年疾病公主就第省視帝復遣尚書唐儉增損藥膳薨年六十九帝素服哭於別次詔魏王率百官臨哭贈吏部尚書圖形凌烟諡曰懿爲人性不苟察臨官務舉綱維去太甚平於雖僂妾不見其喜愠奉寡嫂盡禮家事咨而後行教撫孤姪恩義極隆不減其子徵時人或贈遺及貴厚報之雖已亡必酬贍其家宗姻匱乏周卹咸至薄於自奉未嘗營構室室識者譏其不立家廟四時但祭於正寢後朝廷爲立之長子崇基襲爵至主栗郎中徵直封南城縣男孫燕性至孝爲徐州司馬因母疾盡力醫藥窮其術藝作外臺秘要計籍精明世所通行歷給事中鄴郡太守治聞於時

張玄素蒲州虞鄉人隋末由刑部令史任景城縣曹竇建德陷景城被執將殺之邑人千餘號泣請代曰此清白吏大王卽定

天下所當加禮。今殺之使善人解體。遂命釋縛署治書侍御史。固辭。煬帝已弑。始受黃門侍郎。秦王平建德。聞其名以爲景州錄事參軍。卽位召見。問以治道。對曰。臣觀隋室其君自專其法。日亂一日。萬機必欲自決。中者信善。其不中者日以繼日。乖謬旣多。不亡何待。若使上賢右能。百司善職。疇敢犯之。至隋末分爭。英雄不十數輩。餘皆保邑全身。聽命有道。特患人君不能安肆而挺之使亂耳。以陛下聖神迹。所以危鑒。所以亡日。慎一日。雖堯舜何以加。帝稱善。拜侍御史。尋遷給事中。貞觀四年。詔修洛陽宮乾陽殿。以備東幸。上書陳五不可。始以秦爲鑒。戒大畧言。東都未有幸期。前事土木親王出藩。又當營構。科調繁重。疲人失望。臣聞東都始平。太上皇詔宮室過度。忤觀廣殿。皆焚毀之。陛下謂瓦木可用。請賜貧人事。雖不從。天下翕然稱爲盛德。

不五六年一捨一取天下謂何又每年巡幸不急之務徒然虛費今百姓承亂離之後財賦殫空雖蒙更生意未定奈何輒反前言重耗其力昔漢祖將都洛陽婁敬一言卽日西駕非不知居天下中道里所均但形勝不及關內弗敢康也伏惟陛下化凋弊之俗爲日尙淺詎可東巡以搖人心終復以隋爲言親見用一千人挽一木以鐵爲轂行不數里輒壞更用數百人齎轂以隨一木之費已數十萬其餘可知故阿房成秦人散章華就楚衆離乾陽畢功隋人解體臣恐今日不如煬帝帝問不如煬帝何如桀紂對曰若此殿卒興同歸於亂帝顧房玄齡曰我初不思致令有此觀玄素言後若必往雖赤立露坐亦復何傷仍賜綵二百匹魏徵聞之歎曰張公論事有回天之力可謂仁人之言哉令傳太子承乾兼少詹事屢上疏規以苟違天道人

神棄之古昔三驅非以殺以除民害不宜反玩爲娛有損盛德孔穎達奉詔勸講宜數逮問惡小必去善小必爲禍福之來皆根於初護終若始猶懼其替始之不護終將安歸太子不納俄遷右庶子復上書心爲萬事主動而無節則亂殿下辟質天就尙須學古師訓以表飾之雕蟲小技止可間名以代博弈豈宜屢親騎射褻戲酣歌悅耳目移性靈以爲嘗哉帝聞掘銀青光祿大夫時因太子久不見賓友請問宮中可資聖德如樊姬等者幾何若無之卽便設艷嬖何足顧哉太子憚其過嚴夜遣戶奴狙擊幾危得脫又聞擊鼓聲叩閣正言面出其鼓破之然卒不悛最後不得已復上書曰周武帝平山東罕宮陋食以安海內而太子贊有穢德鳥丸軌以聞帝慈仁不忍廢及踐祚狂暴日熾宗祀以亡故隋文帝代之至楊勇爲太子驕肆敗度當

是時自謂有太山之安詎知一旦致慈父之隙遂致煬帝失國  
今上以殿下父子至親故所費用不爲民節然詔未六旬用贍  
七萬龍樓望院悉爲工匠之肆深宮禁門無異閭閻之區言孝  
敬則闕視膳問安之禮語恭順則違君父慈訓之方求風聲復  
無悅學好道之資觀舉措又有因緣戮辱之罪外所瞻仰如此  
內之隱密可知右庶子趙弘智經明行修數宜引進以廣徽美  
今反猜嫌恐非從善若流之意不聽及太子被廢例坐除名弘  
之名授湖州刺史徙鄧州高宗時以老致仕卒

高季輔名馮以字行德州蓆人祖表魏安德太守父衡隋萬年  
令季輔少好學兼習武藝居母喪以孝聞兄元道隋末爲汲縣  
令會盜起人殺元道以應季輔率家人與戰擒賊首斬以祭兄  
尋盜畏服更來歸附衆至數千俄與武陟人李厚德將其衆降

授陟州總管府戶曹參軍貞觀初拜監察御史彈劾不避權要  
列上封事五條其一今天下大定而刑未措者良由謀猷之臣  
臺閣之吏不崇簡易而昧經遠故執憲者以深刻爲奉公當官  
者以侵下爲益國自今尙書八座宜擇溫厚脩潔之士任之敦  
朴素華浮僞使家識慈孝人知廉恥醜言過行被嗤於鄉忘義  
隳私取損於族自然禮節興矣其二陛下身帥節儉而營繕未  
息丁匠不能給驅使又和雇以重勞費願愛其財毋使殫惜其  
力毋使弊畿內數州京師之本土狹人庶儲蓄少而科役多宜  
蒙優貸令得休息至江南河北人頗舒閑宜爲差等均量勞逸  
其三公侯勲戚各擅封邑廩豐祿厚而貸息出舉爭求餘利何  
怪下民競爲錐刀宜加懲革其四外官界品祿稍涼薄若使不  
恤其匱而須其廉正恐巡察歲出輜軒繼軌而漁獵不息宜及

戶口之繁。倉庾且實。稍加稟賜。使俯仰無累。然後督責其効。則  
官人畢力矣。其五。密王元曉等俱陛下懿親。當正其禮。比見帝  
子拜諸叔。彼此各拜。若封爵相同。當明昭穆。願垂訓正。永示彝  
法。書奏。太宗稱善。累轉中書舍人兼太子右庶子。數上書言得  
失。帝曰。卿言皆藥石。拯亂救危。今賜鍾乳一劑。以相報稱。卿亦  
扶衰養銳。十八年加銀青階。兼吏部侍郎。善銓叙人物。又賜金  
背鏡一。況其清鑒焉。二十二年。遷中書令。檢校吏部尚書。監修  
國史。進爵蔚縣公。永徽初。加光祿大夫。行侍中。兼太子少保。咸  
疾歸第。擢其兄號州刺史。季通爲宗正少卿。視疾遣中使日候  
。此年五十八。贈開府儀同三司。荊州都督。諡曰憲子。正業仕至  
中書舍人。坐善上官儀貶嶺表。

馬周字賓王。博州茌平人。少孤貧。落拓不爲鄉人所敬。性嗜學。



善詩與春秋武德中補州助教不將其事去客密州趙仁本高  
其才厚以資裝使入關至長安舍中郎將常何家貞觀五年詔  
百官言得失何武人不涉學周爲條二十餘事皆當世所切太  
宗怪問何對曰此非臣所能家客馬周爲臣具草耳帝卽令召  
之未至使者敦趣及謁見語甚悅令直門下省明年拜監察御  
史奉使稱職帝嘉何得人賜帛三百匹是歲周上疏言五事臣  
每讀史見前賢忠孝未嘗不廢卷長想思履其迹不幸早失父  
母犬馬之養已無所施願來事可爲者惟忠義而已以是徒步  
二千里歸於陛下不以臣愚擢臣不次竊伏自惟無階答謝願  
竭區區惟陛下所擇其一伏見太安宮在宮城之西墻宇門闕  
比方紫極甚爲卑小太上皇雖志清儉愛惜人力而蕃蕞朝見  
四方觀聽有所不足臣願營雉堞門觀務從高顯以稱萬方之

望其二頃下明詔以暑近幸九成宮竊惟太上春秋既高所宜朝夕定省問安視膳乃一旦去京三百里而遠非能旦發暮到至留太上熱處獨走涼處溫清之道臣所未安其三詔書令宗室勲臣悉就藩國貽厥子孫竊惟陛下意誠愛重欲其裔緒永守與國無疆然不思所以安存保乂萬一子孫不肖襲封嗣職正欲絕之則子文之治猶在欲存則樂繁之惡已彰臣謂宜賦以茅土峙其戶邑必有材行隨器而授方可免累顧陛下深思其事使咸得奉大恩終其福祿其四自陛下踐祚宗廟之享未嘗親事竊惟聖情必謂乘輿一出勞費無藝故恐孝思以便百姓然而一代史官不書皇帝入廟之事將何以示來裔雖云大孝不在俎豆之間聖人訓人示不忘本其五惟名與器不可假人伏見王長通白明達本樂工與阜韋粲提斛斯正更無他材

獨解調馬可厚賜金帛以富其家。豈得預列士流。超授高爵。與外廷朝會。鳴玉曳屨。臣竊恥之。帝善其言。除侍御史。又言。臣歷觀夏商周漢有天下。多者八百餘歲。少者猶四五百。皆積德累業。恩結於人。自魏晉逮周隋。多者五六十。少者三二十年而亡。良由剝業之君。不務仁化。當時僅能自守。後無遺德。一旦微及。忽荒遂至不救。今陛下雖以大功定天下。而積德之日尙淺。當隆禹湯文武之道。以立子孫萬世之基。豈但欲匡救目前。扶寺當年而已哉。今百姓承喪亂之後。比於隋時。纔十分之一。而徭徭相望。兄去弟來。遠者五六千里。略無休時。陛下雖下詔減省。有司不得廢作。徒行文書而已。昔漢武帝承文景遺德。故人心不搖。向使高祖之後。卽值武帝。天下必不能全。又京師及益州諸處。營造供奉器物。并諸王妃主服飾。過於靡麗。陛下少處

人間知百姓辛苦。尙猶如此。卽萬歲後。皇太子生長深宮。不更外事。此聖慮所當憂也。臣又竊尋自古黎庶怨叛聚爲盜賊。其國無不卽滅。後雖悔悟。未有復能安全者。故凡修政立教。當乘及早可修之時。若伺變一起。喪亂及身。禍不旋踵。昔紂笑桀亡而幽厲又笑紂亡。隋煬帝又笑齊魏之亡。果何益耶。往貞觀初。率土荒饉。一縑纔易斗米。而天下帖然者。百姓知陛下憂憐之。故人人自安。無謗讟也。五六年來。頻歲豐稔。一縑易十斛粟。而百姓咸怨者。以陛下不憂憐之。所營爲多不急之務故也。古來興亡不由積蓄多少。惟在百姓苦樂。且以近事驗之。隋貯洛口倉。而李密因之。積布帛。東都而王世充據之。西京府庫亦爲國家之用。向使洛口東都無粟帛。世充與密未必能聚大衆。但貯積者有國之常要。當人有餘力而後收之。豈人勞而強斂之以

資寇耶臣又觀今之諸王年並幼小非特恃恩驕矜昔魏武帝  
寵陳思王以後文帝防守禁閉有同獄囚今大聖創業當制長  
久之法使萬代奉行無爲加恩太過再後適以苦之臣又聞百  
姓安樂在刺史縣令今獨重內官頗輕外任武夫勦人或京官  
不稱始出補外折衝果毅身力強者入爲郎將其次方補邊州  
或以德行才術擢者十不一二所以百姓未安皆在於此疏奏  
帝稱善拜給事中書舍人周善於敷奏機辨明銳深識事端動  
無不中帝暫或不見卽思之岑文本美其論事會文切理無一  
言可損益聽之纒纒令人忘倦蕭張終賈正應此耳然鳶肩火  
色騰上必速恐不能久俄遷治書侍郤史知諫議大夫兼晉王  
府長史昇備後拜中書侍郎兼太子右庶子十八年遷中書令  
職兼兩宮處事精密甚獲當時之譽征遼東留定州輔太子駕

還使攝吏部尙書尋加銀青階帝飛白大書鸞鳳冲霄必資羽翼股肱之寄誠在忠良十六字賜之俄病消渴詔尙食具膳上醫護視帝親爲調藥與太子往問使者不絕疾甚取章奏草焚悉焚之曰毋徒彰君過取身後名也薨年四十八贈幽州都督陪葬昭陵爲人頗自負嘗遣人購宅直二百萬詔有司給直并賜奴婢什物少客汴爲浚儀令崔賢所辱及領選猶記廢之爲人所譏所建白製品官服三品服紫四五品朱六七品綠八九品青及京城諸街置鼓以代晨昏傳警納居人地租宿衛大小番直城門衛舍守捉士月散配諸縣時以爲便高宗卽位追贈尙書右僕射封高唐縣公垂拱中配享高宗廟庭 子載咸亨中爲司列少常伯與裴行儉分掌選事言吏部者稱裴馬焉後終雍州刺史

戴胄字元胤相州安陽人自少明敏秉性堅正及長達於從政  
閑習法律尤善簿最隋末爲門下省錄事納言蘓威侍郎裴矩  
厚禮之越王侗時遷給事郎以諫止王世充篡謀出爲鄭州長  
史與王行本同守武牢秦王攻拔之引爲本府士曹參軍卽位  
除兵部郎中封武昌縣男會大理少卿缺太宗愛惜人命擇公  
清正直者以居卽日命之時無忌被召入東上閣門誤不解佩  
刀封德彝論監門校尉不覺之罪應死無忌坐贖胄准律駁以  
厥罪惟均臣子於至尊不得稱誤陛下錄無忌功自可特原若  
據法贖銅米爲得裏有詔復議德彝執前奏胄又駁曰於法固  
然緣情無別無忌旣以誤輕監校不宜獨死上嘉之許與偕免  
時選者盛集帝許詭資冒牒自首不首坐死俄得不首者當死  
胄擬之以流帝疑其賣獄且示天下不信奏曰法者天下共由

言乃一時喜怒且陛下當其時卽殺之非臣所及旣知不可已  
寘於理若復阿忤違法臣竊惜之其前後犯顏多此類當時以  
爲事無寬濫隨類指擿言若泉湧帝益重之遷尙書右丞轉左  
丞又言先時水旱皆藉正倉賑給無倉之處就食他州百姓多  
致饑乏今喪亂已後戶口凋殘每歲租入不侖充實隨卽出給  
纔供當年若有災凶將何賑恤請自王公已下爰及衆庶計墾  
田多寡以理勸課盡推其餘納於所在立爲義倉特從其議賜  
錢十萬拜爲諫議大夫與魏徵更日供奉久之進民部尙書如  
晦遺言請委以選舉命權吏部尙書然好抑文雅獎法吏士以  
寡學爲訾貞觀四年參預朝政進爵郡公時帝復修洛陽宮畱  
諫曰比見關中河外盡置軍圃宮室強丁並從戎旅重以九成  
作役司農將作見丁無幾一人就役舉室捐業籍軍者督戎仗



課役者責糧齋。竭貲經紀。猶不能濟。七月以來。霖潦未止。濱河  
南北。田正滂下。年之有亡。尙未可知。今宮殿足庇風雨。容羽衛  
數年後成。猶未爲晚。何憚而遽生勞擾耶。帝覽奏。罷役。生平強  
幹長於操決。斷無宿擬議者。美其振職。謂武德以來。殆無其比。  
帝方悉意向。用謂近臣曰。胄於我。非肺腑親。但以忠直勵行情。  
淡體國事。有機要。無不以聞。所進官爵。以酬厥誠耳。又面諭曰。  
尙書總國綱維。失一事。則天下受其弊。今以令僕委卿。宜副朕  
舉。無何。薨。帝哀甚。三廢朝。贈右僕射。追封道國公。諡曰忠。詔虞  
世南爲立碑。又以第陋。不容祭享。詔有司別立廟。聘其女爲道  
王妃。無子。以兄子至德爲後。乾封中。累遷西臺侍郎。同三品。轉  
戶部尙書。父子前後預知國政。時以爲榮。高宗飛白書。泛洪源。  
俟舟楫。以賜拜右僕射。居位慎密。每遇申訴。寃抑。據理難詰。未

嘗予奪遇有理者密爲中奏終不顯已之決斷以是人不及知或以爲問答曰刑罰人主之柄豈容與爭帝尊知而歎美之堯贈開府儀同三司并州大都督諡曰恭

冊曰日不厭青餽已益晶天不厭難閉後愈融隋亂我靖唐治我興我闢諍門諫者雲從仰也及時綱也正行嗟彼王魏已墮沉冥棄暗反讐扳幽向明光昭簡冊千古希逢回天之力羽翼之雄

弘簡錄卷三十七

明刑部員外郎仁和邵經邦弘齋學

皇清翰林院侍講學士四世孫遠平校閱

臺諫 唐五之二

唐臨

兄皎子之奇孫紹

劉洎

權萬紀

族祖弘緒孫懷恩

上官儀

王義方

何彥先附

韓思彥

子琬

馮元常

叔祖明

朱敬則

兄仁悅

蘇珣

子晉

薛登

父士通

王求禮

徐有功

周知附

薛季昶

李福業盧基秀

蔣欽緒

子沈

宋務光

呂元泰附

辛替否

李景伯

子彭年

李义

王志愔

唐臨字本德長安人周內史瑾孫自北海內徙少與兄皎俱有

令名武德初皎為秦府記室參軍專掌書檄深見親待臨以破

王世充策于隱太子引直書坊尋授右衛率府鎧曹參軍太子

廢出爲萬泉丞有輕囚十餘久繫白令使就賦畝相與定約如期而還由是知名再遷侍御史整肅朝儀韋挺爲大夫越次與江夏王道宗語劾以亂班挺失色衆皆悚慄俄持節按交州刺史李道彥獄仲理冤繫出三千人轉黃門侍郎加銀青階高宗卽位遷大理卿嘗問在獄繫囚之數占對稱旨帝喜曰爲國之要在乎刑法刻則人殘寬則失罪惟是折中以稱朕意又嘗親錄囚前所斷者輒呼叫稱冤獨臨所入無一言訴帝怪問故答曰唐卿無冤所以絕意帝嘆曰爲獄者固當若是乃自署其考曰形如死灰心若鐵石永徽元年拜御史大夫會廣州刺史蕭齡之受賕當死詔羣臣議請論如法臨言羣臣不知上所欲議之意在律有入議齡之齊高帝五世孫當在議親議貴之列今旣許議而又加重刑是與禮律相反不可爲萬代法帝然之由

是免死拜刑部尚書加金紫光祿大夫復歷兵吏度支三部尚書坐與來濟善免官起爲湖州刺史卒年六十爲人儉薄寡欲不治第宅服用簡素寬於待物專務掩人過見妻子必正衣冠有真報記二卷 岐貞觀中官吏部侍郎以前選人數少隨到補擬不爲限止時漸太平選者猥衆岐請以冬初而集盡季春止後遂爲法終益州長史贈太常卿 子之奇給事中坐章懷太子僚屬徙邊起爲括蒼令黨徐敬業伏誅 孫紹博學善三禮神龍時爲太常博士韋庶人請妃主命婦以上葬給鼓吹中宗特許之紹言鼓吹本軍容黃帝戰涿鹿以爲警衛故曲有鸞夔吼鴈鵠爭石墜崖壯士怒之類惟功臣得用之雖郊祀天地不以參設容得接閭闔哉請置前詔川舊典不納尋遷左臺侍御史駁祝欽明議皇后南郊亞獻及四時帝誕日遣使者詣陵

灌獻如事生存皆引誼固爭以爲非禮又奏吳順二陵各置守  
戶五百三思及崇訓墓各六十外戚乃與昭陵禮同不可矧親  
王墓戶祇十梁魯追贈乃可踰乎又言比來豪家以備人象膠  
眩耀相矜下逮衆庶流蕩成俗宜按令式裁損凡明器不許列  
衢路惟陳墓所婚家盛設障車擁道爲戲樂邀貨貲甚傷禮化  
不可示天下事雖不從議者嘆美睿宗卽位數言政損益由度  
支員外郎遷給事中兼太常少卿先天二年玄宗講武驪山以  
紹典儀坐失軍容帝怒執蘇下當斬左右猶冀少貸金吾將軍  
李邕遽傳詔斬之會帝悔乃深咎邕罷官憤死于家

劉泊字思道江陵人初爲蕭銑黃門侍郎令略地嶺表下五十  
餘城未還銑敗舉城來歸授南康州都督長史貞觀七年擢給  
事中封清苑縣男轉治書侍御史上言尚書萬機實爲政本頃

者詒教稽塗案成復改。歷年不能下貞觀。初未有令僕職併務  
繁。左丞戴胄右丞魏徵應事彈舉無所回撓。百司震肅不敢懈  
比者勳親在位品非其任功勢相傾雖欲自彊先懼謗故耶  
中嘿奪惟事咨稟尚書依違不得專裁筦轄玩弛綱紀不振今  
宜精選左右丞兩司郎中使皆得人非惟救曠滯之弊固當矯  
拂趨競也。上從之。卽拜右丞健于其職省事復治加銀青光祿  
大夫散騎常侍攝黃門侍郎太宗好持論與公卿言古今事必  
往復難詰究臧否洎諫天以無言爲尊聖以不言爲德皆弗欲  
煩且多記損心多語耗氣心氣內損形神外勞初雖無覺久且  
爲弊矧帝王之與臣庶聖哲之與庸愚上下相懸倫擬寥絕以  
陛下降慈旨假柔顏虛心聽納猶恐畏縮況以神機天辨飾詞  
援古而進其議哉。且今之雍平咸陛下力行所致欲求長久匪

由辨博。但當忘愛憎。慎取舍。若貞觀初可矣。手詔答曰。非慮無以臨下。非言無以達慮。比有談論。遂致煩多。輕物驕人。恐由茲道。形神心氣。非此爲勞。得聞謙言。虛懷以改。適立皇太子。上書宗祧攸繫。興亡所關。弗勤于今。將悔于末。今太子春秋鼎盛。學當有漸。乃優游坐棄。白日居處。內庭不接正人。不聞正論。臣所未諭古者。問安而退。以廣敬也。異宮而處。以遠嫌也。間者一遇入侍。逾旬不出。師傅察案具員而已。非所謂愛之也。亟宜妙選賓客。授以經史。間以書札。開導誘掖。使聆所未聞。睹所未見。羣生之福。乃勅與岑文本。馬周。通日直東宮。會太子。諫帝怒苑西監穆裕欲斬之。帝喜曰。自魏徵亡後。洎與文本。馬周。遂良繼之。吾兒在膝前。閱之熟矣。故有今日言也。十八年。遷侍中。帝嘗對羣臣。欲聞已過無忌。李勣。楊師道。同辭進曰。陛下以盛德致太



平臣等殊不見其有過洎曰誠如此言頃者上書有不稱旨或而窮詰無不羞汗恐非所以獎進言者之路帝展其言以爲能改征遼兼太子左庶子檢校民部尚書輔皇太子監國語以盡心匡弼宜識朕意洎頓首曰願無憂卽大臣有罪臣謹按法誅之帝怪其語戒曰卿性疏而剛恐以此敗會師還帝患癰洎憂之緒遂良素不相協誣增前語謂今輔少主行伊霍故事大臣有異者按誅之及愈召洎問狀引馬周爲證遂良執不已乃賜自盡臨決索筆牘欲辨有司不敢與帝後知之皆得罪文明初詔復官爵

權萬紀其先出天水徙萬年父琢玠隋匡州刺史以愍恩聞萬紀爲人悻直廉約自湖州刺史擢治書侍御史嘗劾房玄齡王珪掌內外官考不平上令按狀咸不伏魏徵奏二大臣所考有

私萬紀時在考堂何無訂正過後舉發此非誠心爲國帝置之  
不問多其不阿貴近益加獎禮又言宇文智及賊殺其君萬世  
共棄今其子乃任千牛請斥屏以懲不軌帝從之時與侍御史  
李仁發皆以言得進頗掉幣自肆衆情懷懼敬以爲闇于大體  
祇計彈射多有不實陛下一切收攬遂敢附下罔上釣直取名  
邀奪聖明以小謀大羣下離心帝漸疎之徙萬紀散騎常侍而  
免仁發數年復名萬紀爲侍書御史奏言宜僦部中可鑿山冶  
銀歲取數百萬帝讓曰天子所乏嘉謀善政有益于下者今不  
推賢進善乃以利規方朕爲何如主耶斥使還第久之復爲御  
史中丞進尚書左丞出爲西韓州刺史徙吳王長史畏其強直  
善遇之齊王祐不奉法帝思得剛正士匡弼素奇萬紀卽徙爲  
長史驟諫祐懼比羣小因不入卽條其過惡以聞帝並召入朝

祐恐設謀害之乃先引道遣所嬖燕弘亮馳騎追斬之殊其支體投園中典軍韋文振本以校尉從帝在伐以質謹自將帝亦使事祐典廐馬切諫不納見萬紀死懼而逃去亦追騎殺之祐死贈萬紀齊州都督武都郡公食邑二千戶謚曰敬文振左武衛將軍襄陽縣公食邑千戶萬紀子玄初高宗時兵部尚書族祖弘壽隋臨汾司倉書佐高祖平京師擢太僕卿爵盛國公奢諡曰恭孫懷恩襲爵累遷尚乘奉御嘗因奏事見帝寵以人安畢羅戲慢不恭退而杖之高宗嗟賞曰真奉御也擢萬年令更慶萊衛邢宋五州刺史洛益二州長史卒爲人姿貌沉毅每盛服妻子不敢仰視所居威名赫然賞罰嚴明惡人遠憚下吏重足而立與汴州刺史楊德幹名相埒焉

上官儀字游韶陝人父弘爲隋江都宮副監遂家焉大業末爲

陳稜所殺儀以幼匿免冒爲沙門及長工文詞涉貫墳典貞觀  
初擢第授弘文館直學士本以辭采自達復工五言詩綺錯婉  
媚人多效之目爲上官體遷秘書郎太宗雅好屬文每遣視藥  
又多令繼和凡有宴集未嘗不預同修晉書成轉起居郎加級  
賜帛高宗卽位遷秘書少監龍朔二年進西臺侍郎同東臺三  
品頗恃才負勢爲人所嫉武后初得志專牽制帝自擅威福帝  
不能堪又引道士行厭勝中人王伏勝發之帝大怒將廢爲庶  
人名儀與議儀曰皇后專恣海內失望不可以承宗廟宜廢之  
以順人心帝使草詔左右奔告后遽詣哀訴帝悔恐后慙怨歸  
過於儀后由是深惡儀以嘗任陳王忠諮議叅軍與王伏勝同  
府許敬宗構與忠謀大逆下獄死籍其家時臺諫閉口結舌莫  
敢正議獨儀奮然納忠禍不旋踵天下冤之自是悉歸政於后

帝拱手聽命而已。子廷芝歷周王府屬亦被殺。孫女後爲昭容。追贈儀中書令。秦州都督。楚國公。庭芝黃門侍郎。岐州刺史。天水郡公。以禮改葬。

冊曰言之廢典。間不以時。方始興府旋復。效隋嗟此數公名播身危。

王義方泗州漣水人。少孤貧。客于魏。事母謹甚。及長。博通五經。寒拔特立。高自標樹。應舉赴京。道遇客。懇言父宦遠方。病欲往省。困不能前。輒遺所乘馬。不告姓名而去。名振一時。不肯造請貴勢。魏徵欲妻以姪女。固辭。何薨後始娶之。其勵志如此。太宗令宰相聽其議論。引員外郎獨孤慙與論百家異同。慙方以儒顯。許敬宗推服之。義方直出其上。左右爲不平。擢第補晉王府參軍。直弘文館。坐善張亮。貶詹州吉安丞。道南海方盛夏。溽霧

蒸湧酌水誓曰。有如因忠獲戾。以孝見尤。四維廓氣。千里安流。神之聽之。無作神羞。誓後。天雲開霽。人謂行義所感。偕介嶷。奕悍梗不馴。爲台首領。選生徒。開陳經書。行釋奠禮。清歌吹簫。登降跽立。人咸悅順。久之。徙洹水。丞適亮兄子皎。自朱崖還。臨終。委托妻子許以歸葬。時皎妻年少。設誓於神。使奴負柩。妻抱子。載以馬。身步從之。葬事已畢。告于亮墓。歸妻其家。方始赴任。歷雲陽丞。著作佐郎。顯慶元年。擢侍御史。性嫉惡。每恨奸邪附離。以欺朝廷。會李義府悅。囚婦淳于氏。有美色。迫大理丞畢正義。枉法出之。事露。因而自縊。無敢白者。義方將加劾。奏意必得罪。問計於母。母曰。汝能盡忠。吾死不恨。乃上言。天子置公卿大夫。欲水火相濟。鹽梅相成。不得獨是獨非。昔唐堯失之四凶。漢高失之陳稀。光武失之逢萌。魏武失之張邈。彼聖傑之主。皆失於

前而得於後。今陛下撫有萬邦。蠻區蕤落。罪無逃罰。况輦轂之下。邪臣得肆殺人滅口。此威福之柄。不出主上。而移奸佞。請下有司。雜治正義死狀。復具對仗彈文。叱義府下。跪讀所言。詞旨凜烈。帝方安其狡佞。恨義方以孤士觸宰相。貶萊州司戶參軍。既以直道不容。任終往。客昌樂聚徒教授。母喪。隱居不出。卒年五十五。爲人廉守。不貪嘗更第宅。後數日。愛庭中樹。復名主人曰此佳樹。得無欠償乎。仍予以錢。旣死。門人具半千。何彥先行喪。蔣松柏冢側三年。乃去。彥先齊州全節人。武后時位天官侍郎。

韓思彥字英遠。鄧州南陽人。游太學。萬年令李乾祐異其才。擢下筆成章。志烈秋霜。科授監察御史。昌言當世得失。高宗名加二階。待詔弘文館。使內供奉。命巡察劔南。引什加令鄧。憚知後

必貴。委托子孫。益州有兄弟相訟。累年不決。召至。飲之以乳。翻然覺寤。齧肩相泣。自甘獠俗。不識孝義。雷化復生。訟卽解。輟誘降西洱河叛蠻。民饑。賑貸。聖書褒美。復使并州。有盜殺人。主名不立。適醉。胡懷刃。訊掠。誣服。疑爲未真。晨集童兒數百。募乃出之。物色推訊。如是者三。遂獲真盜。嘗因太白。晝見勸帝修德。帝讓中書令李義府曰。八品官能言得失。而卿目富貴主何事耶。義府愧謝。又劾司農武惟良擅用并州賦二百萬。處死后。爲請免坐。是交譖。出爲山陽縣丞。至官。閱月。釋尉遲敬德子寃。不受其賄。自免而去。放跡江淮。所引鄧憚爲文昌左丞。薦補建州司戶參軍。帝召問復。其御史俄出爲江都主簿。徙蘇州錄事參軍。罷客汴州。詔旌張僧徹廬墓。請爲文。頌僧徹。卽之以繼不受。固請爲受一匹。命其家曰。此孝子。繼不可輕用。上元中。復召見。詆



外戚擅權李敬玄因后宿怨効以見上不蹈舞負氣鞅鞅徙朱  
鸞丞遷賀州司馬卒 子琬字茂貞初舉茂才授高郵簿連中  
文藝優長賢良方正拜監察御史景雲初上言國之安危係于  
政尚以法始暫安後必危尚以德始謂遷終必治貞觀永徽之  
間農勸而耕者衆法施而犯者寡吏貪者士恥與同列故清白  
忠正比肩而立罰雖輕而不犯賞雖薄而能勸位尊不佞家富  
不奢學校不勵而勤道佛不懲而戒土木質厚裨販不嗤其故  
奈何雜以王道也自茲以來任巧智斥謇諤趨勢者進守道者  
退諧附者無黜剝之憂正直者有後時之嘆人趨家競風俗淪  
替其故奈何行以霸道也夫巧者知忠孝爲立身之階仁義爲  
百行之本託以求進口是而心非言同而意乖陛下安能盡察  
哉貪冒者謂能清貞者謂孤浮沉者爲結剛正者爲愚位下而  
弘簡錄

務捉搦者法也。法設而滋章。滋章則盜賊多矣。故曰設法不如  
息事。事息則巧不生。聖人防亂未然。天下何由不治哉。永淳時  
雍丘令尹元貞坐婦女治道免官。今婦夫女役會不知怪調露  
時河內尉劉憲父喪請選以爲負名教。今匿名冒進以爲知幾  
太宗朝司農以倍價市木。權孫伏伽言其識大體。今百凡和市  
有類白奪往。學生佐史里正員闕擬者十人。今亡匿以免往選  
司從容有禮。今如買販爭奪往商賈出入萬里家藏銀粟。今市  
井失業。匿貨不出。往外寄歛。關募人買勇。今屯留差勒。閻宗逃  
亡。譬則亂繩已結。急引之則不可解。今刻薄吏結之者也。舉劾  
吏引之者也。惟解者未見其人。願取奇才卓行。量能授官。書入  
不報出。監河北軍兼按察使。先天中賊稍非時。發益賤。繼益貴。  
人多徙亡。嘆曰御史乃耳目官。知而不言。尚何賴。又言須報則

弊已甚。移檄罷督。乃聞詔可。開元中遷殿中侍御史。坐事貶官卒。

馮元常相州安陽人。其先長樂信都著姓。曾祖子琮北齊右僕射叔祖慈明有文辭。隋內史舍人奉詔討李密爲所獲。厚加以禮。願與並事。不從。因之後爲翟讓所殺。武德初贈吏部尚書。諡壯武。元常舉明經及第。調浚儀尉。高宗時擢監察御史。密諫中宮權重。宜少抑損。帝雖爲所制。內亦然之。俄爲劾南道巡察使與剽除害蜀人。順賴永淳中入爲尚書左丞。在任議鑒澄遠號爲。帝委遇特厚。及后臨朝。羣臣多獻符瑞。嵩陽令樊文進瑞石。后暴于朝堂。奏以爲妄。不可持示中外。后怒出爲隴州刺史。道從眉州。光火有盜夜掠。晝伏喻以恩信。相率面縛。賊平。轉廣州都督。安南酋領李嗣仙殺都護劉延祐。劫州縣。詔討之。馳

檄先示禍福繼率士卒航海賊黨多降斬其首惡安慰居人而  
旋雖屢有政績竟以前忤不錄其功卒爲酷吏周興陷死天下  
高其節推舉閭閻雍睦兼有禮法必以歸之雖小功喪不御私  
室凡名族皆願通婚神龍中旌其家曰忠臣之門

朱敬則字少連亳州永城人代以孝義旌顯自周至唐六閥相  
望敬則少好學重節義以文詞著名與人交志向恢博嘗服其  
急恆不責報與江融魏元忠善高宗聞其名咸亨中召見授洹  
水尉久之除右補闕上書武后曰往者亡泰行中韓之法重刑  
名之家張公室杜私門此皆救弊而然至于天下已一可易之  
以寬簡潤之以淳和顧乃淫虐滋甚往而不反卒至土崩此不  
知變之禍也漢時區宇適定乃亟陳詩書說禮樂開王道納陸  
賈之說用叔孫通禮儀此知變之善也故臣聞之仁義者聖人

之遠。虛禮樂者聖人之陳迹也。禍視單狗。捐淳精流糟粕。棄國家自文明以來。人心未一。故不設鈞距。無以禁奸。不切刑罰。無以息暴。比者不出房闥。天下晏然。仰向時謀策。今之芻狗也。願鑒秦漢之失。考時事之宜。避愆虛遺。糟粕下寬大之。今流曠蕩之澤。頓險邪之芒刃。塞羅織之門戶。使天下廓然更始。豈不樂哉。后善其言。遷正諫大夫。兼修國史。嘗採魏晉以來君臣成敗之事。著十代興亡論。又以前代文士論秦廢五等。漫以爲失。事無折衷。乃著五等論。由秦漢魏以中。齊育肯綮。當世以爲知言。奏請高史官選。博求名世之才。侍中章安石曰。世人不知史官權重。宰相但能制生人。史官兼制生死。古之聖君賢相。所以畏懼者也。時賦斂繁重。民多蕩析。后數召入禁中。訪失得。進同鳳閣鸞臺平章事。在職每以用人爲先。細務不省。嶺表蠻叛。薦

裴懷古有文武才。用爲桂州都督。繼服其威惠。相率來降。又薦  
魏知古爲鳳閣舍人。張思敬爲右史。皆稱職。二張權盛。方構魏  
元忠。張說欲誅之。無敢言者。敬則獨奏言。二人秉心忠。一所坐  
無名殺之。失天下望。乃得不死。俄以老疾還政事。改成均祭酒。  
轉冬官侍郎。會修三教珠英學士。李嶠等十八人。方繪圖像。欲  
引敬則固辭。不與。世稱其高潔。神龍元年。出爲鄭州刺史。密語  
敬暉等。若假太子令。舉北軍誅豎子。兩飛騎力耳。暉等卒用其  
策。尋許致仕。爲冉祖雍誣。奏與王同皎。皆貶涪州刺史。旣而明  
其非罪。改廬州代還。一無長物。止乘一馬。子曹步從。以歸。卒年  
七十五。睿宗卽位。問褒贈。尚有遺者。劉幽求對曰。敬則忠正義  
烈。天下所推。長安中。嘗語臣。相王必受命。當悉心事之。臣見危  
赴難。實其所啓。乃追贈秘書監。諡曰元。兄仁軌。字德容。隱居。

養親四十年財產皆同無分異訓誨子弟以禮讓終身按察使趙承恩表其所居有赤烏白鵲棲樹之祥及卒郭山憚員半千魏知古私謚為孝友先生

蘇珣雍州藍田人申明經第訓鄆縣尉裁決明辨鄆多訟風俗頓革長史李義琰異之顧廳事曰此公坐也恨吾不及見耳垂拱初為右臺監察御史永后密牒按韓魯諸王推訊無狀名見詰問抗議不回后不悅改命他人出為河西監軍五遷右侍郎中御史王弘義受詔伐村於號管督過程丁夫多死以附來俊臣莫敢觸其鋒珣按奏其事免之遷給事中進左肅政臺御史大夫疏諫營大像白司馬坂及據時令停韋月將行刑俱荷詳納俄出為岐州刺史復轉右臺大夫詔根索節愍太子支黨辭連府藩密啓保之且為辨明帝感悟擢戶部尚書封河內郡

公歷太子賓詹致仕卒年八十一贈兗州都督諡曰文子晉  
數歲能文作八卦論吏部侍郎房叔秘書少監王紹宗與爲  
後來王粲舉進士及大禮科皆上第先天中爲中書舍人兼崇  
文館學士玄宗監國所下制命多晉撰定又屢獻讜言天子嘉  
允俄出爲泗州刺史以父老解職奉養卒後襲爵歷戶吏二部  
侍郎與齊澣更典二都選獨事實拔當時譽之尚書裴光庭徵  
有不悅出爲汝州刺史轉魏郡加銀青光祿大夫爲太子左庶  
子卒年五十九始與洛人張循之仲之善二人皆以學顯後忤  
武后俱死晉厚撫其子爲營婚授官晉卒喪之亦若諸父人以  
是並稱其賢

薛登本名謙光常州義興人父士通隋鷹揚郎將江都亂與州  
民間人嗣安據其城武德初來降授東武州刺史輔公祐反破



賊將西門君儀亂平封臨汾侯終泉州刺史登自幼通貫文史  
善議論凡前代故事必廣引根證有如目擊與徐堅劉子玄齊  
名友善調聞中簿天授中遷左補闕時薦舉頗濫登因建言臣  
聞國以得賢爲寶臣以舉士爲忠故堯咨八元而庶績其理周  
任十亂而天下和平士誠不可不察而官固不可妄授也比觀  
舉薦類不以才馳聲假舉互相推引希潤身之小計忘得士之  
大猷非所謂報國求賢者也古之取士考素行之源詢鄉邑之  
譽崇禮讓明節義以敦樸爲先雕文爲後故人崇勸讓士去輕  
浮以貢之賢愚爲州之榮辱昔李陵降而隴西慙于木隱而西  
河美名勝於利則偷競日銷利勝於名則貪暴滋煽興缺以禮  
讓升而晉人知禮文翁以經術教而蜀士多儒未有上好而下  
不從者也自魏取放達晉先門閥梁陳薦士特尚詞賦獎爲人

求官之風。乖授職。惟賢之義。建附文。納李諤之言。詔禁文學浮詞。罪泗州刺史司馬幼之。表不典實。由是風俗稍改。煬帝嗣變前法。始置進士等科。於是後生復相倣倣。赴速趨時。緝綴小文。名曰策學。不以指實爲本。而務浮虛爲貴。方今舉士。尤乖其本。明詔方下。固已驅馳府寺之廷。出入王公之第。陳篇希恩。奏記酬報。故俗稱覓舉。夫覓者自求。知非爲人所知之。是以耿介之士。羞於自拔。循常小人。棄疎取附。願陛下降明制。頒峻科。斷無當之游言。收實用之良策。文試劾官。武閱守禦。自能試凌雲之策。練穿札之工。昔吳起將戰。不取刀劍。諸葛臨陣。不親戎服。漢武聞司馬相如之文。恨不與同時。及其至也。終不處以公卿之位。謹按漢法所舉之主。終身保任。田儀責楊雄之冒薦。魏相酬成子之得賢。賞罰之令行。則請謁之心絕。退讓之義著。則貪競

之路銷仍請寬其年限以容簡汰不責免王丹之官得人加羣  
瑛之賞自然見賢不隱貪祿不專矣尋轉水部員外郎遷給事中  
中上書臣聞三代以來戎夏不雜有時朝謁已事則歸今世突  
厥阿史德元珍吐蕃論欽陵契丹孫萬榮往因入侍並被獎遇  
官戎秩步費門還後並爲邊患臣慮若再豫備不謹易以稱兵  
恐非貽謀之道自今可一切禁絕武后不納久之出爲常州刺  
史值宣州鍾大眼寇亂百姓潰震登嚴勒守備闔境賴安歷刑  
部侍郎尚書左丞加銀青階景雲中爲御史大夫務直邪枉不  
肯苟取容悅以劾僧慧範怙太平公主勢奪民邸肆爲主所構  
出爲岐州刺史主誅後遷太子賓客轉刑部尚書加金紫光祿  
大夫昭文館學士開元初爲東都留守坐子累歸田里家貧詔  
給致仕祿卒年七十三贈晉州刺史撰四時記二十卷

王求禮許州長社人。則天時爲左拾遺。遷監察御史。性忠。嘗取言每上封彈。奏無所畏避。武后。方營明堂。珎飾譎怪。諫以古制。茅茨采椽。今鐵鸞。金龍。丹腹珠玉。乃商瓊臺。夏瑤室之比。所釐負輓。以人代畜。事皆非禮。書入。不報。河內王武懿宗。率兵禦契丹。孫萬榮畏懦。不敢進。賊大掠而去。旣而反。奏滄瀛誤賊百姓數百家。請誅之。求禮駁以。余卒小民。素無教習。爲賊脅制。寧素持叛心哉。懿宗身爲大將。受國重任。乃移禍無辜之人。臣請先斬邪佞之首。以謝河北。懿宗懼。后乃盡赦其人。又以饋輓屈竭。左相豆盧欽望。請停京官九品以上兩月俸。以助軍興。而謂公祿萬鍾。正可解轍。若小臣仰祿。烏可以同欽望作色求禮。歷階進曰。天子富有四海。何恃九品俸。使宰相奪之耶。姚璹謂秦漢皆佐以訖算。求禮不識大體。妄爲此言乎。曰。秦漢虛天下事。邈

奈何使陛下敎之后日止。久視二年三月大雨雪。蘇味道等以爲瑞。率羣臣入賀。求禮讓曰。宰相變和陰陽。今陽氣債。升陰水。激射此乃天災。若果爲瑞。則可以冬月雷爲瑞。雷矣。味道不從。賀者入求禮。從後厲言。主荒臣佞。寒暑失序。蕃華參處。盜賊繁興。正官少。僞官多。百司非賄不入。使天有瑞。何感而來哉。羣臣震恐。后爲罷。毋卒以剛正爲官。齟齬神龍。初終衛王府參軍。

問曰。周已代唐。萬事興革。獨容善言。誅戮不及。顯晦隨時。卓然自立。

徐有功。名弘敏。以字行。祖文遠。別傳有功。初襲東莞縣男。復舉明經。調蒲州司法參軍。爲政寬仁。不忍杖罰。民服其惠。相約毋犯。代滿不辱一人。遷司刑丞。時方崇尚酷吏。構陷無辜。抵極法者不可勝記。朝野震恐。莫敢正言。獨有功數犯顏爭枉直。太后

厲語折抑。爭論益牢。琅邪王冲以責息錢與貴鄉尉顏餘慶相  
知。冲既坐逆。魏州人告餘慶豫其謀。詔俊臣鞠治。以反狀聞。侍  
御史魏元忠請誅籍。其家有功。廷論永昌赦。令虺貞魁首已誅。  
支黨未發者。原之餘慶。赦後被言是謂支黨。今以支爲首。反生  
入死。竊謂朝廷不當爾。后意解。乃曰。公更思之。當此時。左右及  
衛仗數百人。皆縮項不敢息。而有功獨能氣定言詳。截然不撓。  
又韓紀孝者。受徐敬業僞官。已物故。推事使顧仲瑛籍其家。詔  
已報可有功。追議曰。準律。謀反者斬。身亡卽無斬法。無斬法。又  
安得相緣坐。所因之罪。詔從之。減凡數十。百姓累轉秋官員外  
郎中。俄而鳳閣侍郎任知古。冬。官尚書裴行本等七人。被誣羣  
臣。悉力丐請。后許賜以再生。俊臣獨引行本奏告。張知謇與廬  
陵王謀反不實。當處斬。有功。再駁奏曰。俊臣違在上再生之賜。

爲人臣將順之美不可以示信乃得免死道州刺史李仁褒其弟檢次令長沙爲唐奉一誣構私議乘輿吉凶謀復李氏有功爭其事不能得周興劾之曰漢法附下罔上者斬有功故出反囚罪當死請按之后不許坐免官俄起爲左肅政臺侍御史薛昌臣聞鹿走山林而命繫庖廚陛下以法用臣臣守正行法必坐此死后罔授之天下聞其復進欣然相賀時有詔公坐流私坐徒以上會赦免踰百日不首者復論有功駁奏曰凡律告赦前事以其罪坐之若無告言所犯亦不自發如今告言前事卽恩雖布而一罪不能貸臣竊謂陛下不取又嘗上言陛下卽位以來天下職員有定而海內選人日多掌選之曹用舍不平補擬乖次兼之委屬公行黨謗盈路寔以爲常又法司徒經酷吏鞠訊結斷刑獄慘嚴其流弗改事表生情法外構理刻薄吏因

之驅扇成姦雖朝堂列匭內牒受章叫聞弗聽叩鼓弗聞名曰  
申寃正增其枉頃蒙擢用無由上答願以執法酬恩無縱詭隨  
是臣之分誠令天官銓注有所不本法司推斷舞法深詆三司  
理牒擁塞不自者皆許臣按驗劾發奪祿貶勞當不踰時可致  
刑措后納之無何奴告竇孝謹妻龐氏厭詛命薛季昶鞠訊當  
死子希城訟寃有功雪之季昶劾其黨惡當棄市有功方視事  
令史泣以告夷然無懼徐曰豈吾獨死而諸人長不死耶安步  
而歸后召詰此斷獄多失出何也對曰失此臣小過如生陛下  
大德后默然祇坐除名尋起爲右司郎中轉司刑少卿同事皇  
甫文備復誣之已而文備坐事下獄或爲喜曰必有以報對曰  
爾所言者私忿我所守者公法仰出之嘗語所親大理人命所  
繫不可阿旨詭辭以求苟免故凡三坐大辟將死泰然不憂赦



之亦不喜。后益重之。酷吏視者咸爲少衰。然疾之如讐。改司僕少卿。卒年六十八。贈司刑卿。中宗卽位。加贈越州都督。遣使就第。弔祭。賜物百段。授子愉官大理司直。開元初。寶希城請以已官讓愉。以報舊德。遷恭陵令。終中王府司馬。會昌中。追諡忠正。初。鹿城主簿潘好禮慕其爲人。論曰。昔張釋之當漢文帝時。中外無事。守法而已。有功居革命之際。周興來俊臣等掩義隱默。崇飾惡言。以誣盛德。乃能守死。明道濟危。不變此其賢於釋之。明其起居舍人盧若虛又曰。徐公當雷震之震而能全仁恕。雖千載未見其比。而唐史贊曰。不以唐周貳其心。可謂得其本矣。又載初元年在臺御史周矩上疏曰。頃者小人告訐。習以爲常。內外諸司人懷苟免。姑息臺吏。承接強梁。非故欲規避。特以懼誣搆耳。而推劾之吏爭以深刻爲功。至泥耳籠頭。枷研次擒。

捐脇鐵爪懸髮薰目臥隣穢滯會不聊生號爲獄持或累日節食連宵緩問晝夜搖撼使不得眠號曰宿囚此等本非木石且救目前苟求除死臣竊聽輿議皆稱天下太平豈被告者各懷非望耶只是不勝楚毒自誣其反陛下若果不信試取告判無驗者再付有司推訊必上下其手希合聖旨願陛下察之今滿朝側息不安皆謂陛下朝與之密夕與之讐每對妻子恆爲死訣臣聞爲國者以仁爲宗以刑爲助周用仁而昌秦用刑而亡此之謂也后覽疏爲之開寤制獄稍息矩後因論薛懷義遷天官員外郎復爲所構下獄死

問曰孔切救人不蹈于死孟先行法俟命而止君子秉心務求真是彼潘彼盧得其疑似何以明心矩真御史

薛季昶絳州龍門人爲人剛幹義烈武后時上書自布衣擢監

察御史以累左遷平遙尉萬歲通天中屢按制獄如旨擢給事中河北按察使令按夏官郎中侯昧虛討契丹不利妄言賊行有蛇虎導軍后惡其詭馳至斬昧虛以聞又棗城尉吳澤貪虐嘗射殺驛使髡民女髮爲髽甚爲人吏所患守者不能効復杖殺之在任威震遠近望風懾懼仍布恩信甄表善良就加御史中丞由定州刺史爲雍州長史威名甚著前後京尹無及之者遷文昌左丞長安末爲洛州長史預誅張易之時東之等勸兵景運門勸曰二凶雖誅產祿猶在請除之會日暮事遽彥範等不欲廣殺因曰三思枕上肉爾留爲天子藉手季和歎曰吾無死所矣事成進戶部侍郎旣而三思果盜朝權五王失柄出季和荆州長史貶儋州司馬同功者嘆曰死我者桓君也彥範亦曰吾意主上英武留武氏使自誅定今大事已去豈非天乎初

季昶與昭州首領周慶立廣州司馬光楚客不協既貶懼二怨  
乃具棺沐浴自仰藥死睿宗立贈左御史大夫賜一子官生平  
敦愛故舊敬禮名士喜先入語以爲實後雖辨理不能得也又  
御史李福業處襲秀亦與範謀後流番禺福業亡匿吉州參軍  
敬元禮家吏捕得俱死將刑謝元禮曰子親在吾甚相愧恨見  
者傷之襲秀祖方慶武德中爲察非掾秦王與謀建成辭母老  
旬身歸養王聽之後擢爲藁城令及是爲非祖雍所按治襲秀  
不屈祖雍懼其諸弟報復遂得不坐

蔣欽緒萊州膠水人少工文辭性孤介重交誼與賈會郭利貞  
交善擢第遷太常博士中宗時抗論郊祀大典不可曲徇祝欽  
明阿意廣請皇后亞獻一時儒者咸壯其節後爲吏部員外郎  
務薦引士類韓琬方自負其才題詩客舍有不遇之嘆後爲賢

良方正擢其文異等因謂朋友之過庶幾可免琬亦以今日聲  
名之達始見君子之心未爲徒然久之出爲華州刺史復精治  
道馭吏嚴整雖銖杪之罪不爲少貸與蕭至忠姻家至忠自晉  
州被名赴京戒以君才不患不用患非分而求耳後果及禍開  
元十三年拜御史中丞錄河南囚宣慰百姓振窮乏尋遷吏部  
侍郎歷汴魏二州刺史卒 子沈性亦狷介博學有名舉孝廉  
授洛陽尉遷監察御史河南尹韓朝宗裴迥委以訊覆檢勾之  
任處事平允剖斷精當勛爲羣僚楷式乾元中歷陸渾監屋威  
陽高陵長安五縣令當軍旅之後瘡痍未平乃竭心綏撫所在  
安輯聲聞流布長老紀焉郭子儀每敕麾下以將令清白嚴幹  
供億常有素毋撓其政後轉刑部郎中兼侍御史領渭橋河運  
出納使元載當柄滯不得遷衆議稱屈常袞擢御史中丞東都

副留守進刑部侍郎改大理卿持法明審號爲稱職建中初奔奉天賊候騎執之脅以僞職絕食稱病潛窺閤里京師平首蒙旌擢拜右散騎常侍卒年七十四贈工部尚書

宋務光字子昂一名烈汾州西河人及第調洛陽尉遷右衛騎曹參軍神龍元年應詔上書臣觀天人相與之際有感必應其間甚密是以教失於此變生於彼竊見自夏以來虹霓紛錯水氣勃戾天下多罹其災夫水者陰類臣妾之道氣盛則水泉溢後庭近習或有離中饋之職以干外政願深思天變杜絕其萌乳保之母妃主之家以時接見無令媒褻又自春及夏疫氣浸淫牛多病死傳曰思之不瘥時則有牛禍意者苟機之事陛下未躬親乎願勤思法宮擬就大化以萬方爲念不以聲色爲娛以百姓爲憂不以犬馬爲樂若謂災興細微安之不怪一旦

變已成。駭而圖之。猶水決治防。病困求藥。雖復僱僦尚何救哉。  
數年以來。公私乏竭。戶口減耗。家無接新之儲。國乏俟荒之蓄。  
近觀朝市。似爲庶富。試踐閭陌。則百姓衣馬牛之衣。食犬彘之  
食。丁壯盡於邊陲。孺孤轉於溝壑。猛吏奮毒。急政破資。而吝尚  
未息。法維崇僞。長吏貪冒。選舉以私。稼穡之人少。犯亂之人衆。  
願坦然更化。以身先之。凋殘之後。緩其力役。久弊之極。訓以淳  
龐。臣又聞太子者。守器承祧。養民質業。願擇賢能。多社稷慰黎  
元。如武三思等。誠不宜任。以機要。鄭普思。葉靜能。挾小道淺術。  
願陛下遠之以親。有德疏。奏不省。俄授監察御史。巡察河南。建  
言。通邑大都不宜封殖。今命侯之家。專擇雄奧。滑州七縣分封。  
者五王。賦少於侯。租入家倍於輸國。請以均之餘州。仍歲停封。  
使息傳驛之勞。不納。以考最。進殿中侍御史。遷右臺督薦汝州。

參軍李欽憲後爲名臣卒年四十二時又有清源尉呂沅泰亦上書言時政曰國家者至公之神器一正則難傾一傾則難正。自頃林胡數叛獯鬻內侵帑藏虛竭戶口亡散不謂太平邊兵未解不謂無事水旱爲災不謂年登倉廩未實不謂國富而乃驅役飢寒彫鐫木石營繕不急勞費日深恐非陛下中興之要此見坊邑相率爲渾脫隊駿馬戎服名曰蘇莫遮旗鼓喧騰爭戰相逐旣非雅樂且乏美名豈所宜於禮義之朝哉書聞不報

辛替否字協時萬年人景龍中爲左拾遺上疏中宗曰凡爲人主愛惜官爵慎行封賞義以制用朝廷餘俸百姓餘食遐儲餘備今陛下愛一公主百倍行賞十倍增官金銀不供其印束帛不充於錫竭人之力費人之財奪人之家使邊疆士不盡力朝



廷士不盡忠可謂用不合古義行不根入心將變愛成憎轉福  
爲禍向使魯王恩並諸壻則有常享之福無一朝之戮竊謂陛  
下忘前悔忽後禍乃所以憎之非所以愛之也猶尚不止大建  
寺宇臣謂佛者清淨慈悲體道濟物不利己以損人不榮身以  
害教今三時之月掘山穿地以損物命殫府虛帑以損人財廣  
殿長廊以榮身已損命則不慈悲損人則不愛物榮身則不清  
淨寧佛者之心乎臣以爲減彫琢之費以賜不足斯佛之德息  
穿掘之害以全昆蟲斯佛之仁罷營構之直以給還墮斯見在  
之功回不急之祿以購廉清斯未來之福且出財依勢避役亡  
命類度爲沙門是致人以毀道非廣道以求人也今天下之寺  
無數一寺當陛下一宮十分天下之財佛已有其七八假如水  
旱相仍沙門不能擬甲寺塔不足覆仇帝不省廢宗立轉左補

闕復上疏言太宗陛下之祖撥亂立極得至治之體省官減吏  
舉天下職司無虛授用天下財帛無枉費賞必待功官必得才  
爲無不成征無不服不多守觀而福祿至不度僧尼而智殃滅  
陰陽不愆五穀遂成粟腐帛爛享國久長中宗陛下之兄取譏  
萬代貽笑四裔不聽賢臣之言而悅讒佞之習奪百姓之食以  
養凶殘剝萬人之衣以塗土木國家所出日加所入日減所惡  
逐者必忠良所愛賞者皆邪惡六年之間三禍爲變人怨神怒  
親忿衆離享國不永陛下若法太宗治國泰山之安可致也法  
中宗治國累卵之危亦可致也頃淫雨不解穀荒於隰麥爛於  
場去秋亢旱霜損蟲繁草木枯黃下人咨嗟未知所濟而金仙  
玉真相繼營造計用緡錢百餘萬陛下知倉有幾歲儲庫有幾  
歲帑百姓何所活三邊何所輸而以百萬構無用之觀受天下

之怨何以繼祖宗。觀萬國耶。在韋氏時。切齒羣臣。今貴為天子。不改其事。恐復有切齒于陛下者。往見明勅。一用貞觀故事。貞觀有此乎。惟宗晉卿勸中宗為第宅。趙履溫勸為園亭。議兵交馳。亭不得游。它不得息。今茲二觀得無晉卿之徒。陰勸為之。不可不察。疏奏。雖不能川尚嘉其切直。遷右臺殿中侍御史。按雍令劉少微恃權貪賊。岑義為屢請不肯。體勢縱法。少微坐死。後遷潁王府長史。卒年八十。

李景伯宰相懷遠。子景龍中。為給事中。遷諫議大夫。中宗宴侍臣及朝集使。酒酣各命為迴波詞。眾皆以語言媚上。或要巧謬寵。至景伯獨曰。迴波爾時酒后。微臣職在箴規。侍宴已過三爵。誼諱竊恐非儀。帝覽之不悅。蕭至忠嘆為真諫官。景雲中。進太子右庶子。與舍人盧僔建議。今天下諸州分隸都督。專生殺刑。

賞使授非其人則權重毀生非強幹弱枝經邦軌物之誼願罷  
都督留御史以時按察秩卑任重以制姦宄詔從之後終右散  
騎常侍子彭年有吏才割斷明悟當時稱之歷考功員外郎  
中書舍人給事中兵吏二部侍郎與李林甫善引就清列典選  
七年以賊敗長流臨賀郡天寶十二載擢濟陰太守徙馮翊陷  
於祿山者以僞官憂憤而死贈禮部尚書

李父本名尚真趙州房子人少孤年十二工屬文既長與蘇頲  
畢構馬懷素善薛元超許以他日有海內名登進士茂才興等  
二科調萬年尉長安三年擢監察御史劾奏無所避常條葉靜  
能姦邪怙勢中宗不納遷中書舍人修文館學士帝遣使江南  
發所在庫貲以贖生父疏以爲江南魚鼈之利衣食所資江湖  
之生無窮而府庫之財有限與其拯物不如憂民且醫生之徒

惟利所視。錢刀日至。網罟益增。施之一郡。營之百億。若同所賦之貨。減方困之徭。其澤多矣。韋氏之變。詔令嚴促。多又草定。魏吏部侍郎。仍知制誥。與宋璟等同典選事。請謁不行。時人語曰。李下無蹊。徑受黃門侍郎。封中山郡公。制敕不便。輒取正。貴幸有求官者。睿宗曰。朕非有靳顧。李又不可耳。諫罷金仙玉真帝。雖不從。優容之。太平公主干政。欲引又自附。深自拒絕。開元初。特令與蘇頲纂集起居注錄。其昌言嘉謨。可體國經遠者。別編奏之。姚崇畏又明切。薦爲侍郎。外托引重。實去其綴。駁權未幾。除刑部尚書。年六十八。贈黃門監。諡曰貞。爲人沈正方雅。識治體。時稱有宰相器。事兄尚一尚貞。孝謹文章。齊名有李氏花萼。集總二十卷。尚一終清源尉。尚貞博州刺史。

王志愔。博州聊城人。擢進士。神龍中。爲左臺侍御史。執法嚴正。

百僚敬憚人吏悉皆誓服呼爲阜鵬言其顧瞻之可懼也尋遷大理正嘗奏法令者人之隄防不立則無所制今任者多不奉法以縱罪爲仁特文爲苛臣執刑典恐速得謗謹上所著應正論以見志因以規帝失凡數千言大略云易萃之六二曰引吉無咎謂處萃之時已獨居正異操未能變體以遠于害惟九五應之乃履正迎吉由已居下位而中正是托期于上應之不括喪于守祿也故觀魚于棠臧伯正色賂鼎在廟哀伯抗詞此異操而聚引吉之所致也魏徵理直太宗乃復其位邾人辭順趙盾不伐其國此非正體未變爲吉所迎者乎夫刑賞二柄惟人主操之故曰以力役法者百姓以死守法者有司以道變法者君上魏游肇爲廷尉帝私敕有所降恕肇執不從曰陛下自能恕之豈可令臣曲筆今爲國者類言以嚴致平非以寬致平嚴

者非凝網重罰。在人不易犯而防難越也。昔漢武帝甥昭平君殺人廷尉上請帝垂涕曰法令者先帝所造用親故誣先帝法吾何面目入高廟乎卒可其奏隋文帝愛子秦王俊爲并州總管以奢縱免官楊素請赦之帝謂若從其請則朕乃五兒之父非兆人之父當別制皇太子律矣故天子操法有不變之義况於秋官典職司寇肅事而可變動者乎帝嘉之遷駕部郎中景雲初轉左臺御史中丞遷大理少卿出授齊州刺史充河南道按察使徙汴州封北海縣男太極元年加銀青階實封百戶拜戶部侍郎出爲魏州刺史改揚州長史所至破碎姦猾令行禁止境內肅然開元九年帝幸東都詔留守京師權梁山謀反坐不能勦滅慚悸而死